

Dan škole – aktivnosti koje su obilježile školsku godinu

Danas, 17. maja, obilježavamo Dan škole. Iza nas je školska godina u kojoj se nastava odvijala, uglavnom, onlajn. Ni u ovo vrijeme pandemije nismo se bojali izazova svjesni da su zainteresovanost i želja za znanjem osnovni preduslovi za napredak.

Poslije dugotrajnih aktivnosti, škola je preko nevladine organizacije Centar za promociju civilnog društva ušla u projekat Certificiranje eko škole za period 15.3.2021. do 15.2. 2022. godine. Cilj projekta je povećanje svijesti učenika i osoblja škole o potrebi ekološki održivog ponašanja u školama. U tom kontekstu poduzete su sljedeće aktivnosti: nabavka kanti za selektivno odvajanje otpada, posađena je živa ograda cijelom dužinom dvorišta škole, uređeno je mjesto za kompostiranje, u toku je nabavka solarne klupe, izrada kamenog vrta te izrada eko kutka. U toku su radovi na sanaciji degradirane površine dvorišta, oblikovanje postojećeg ukrasnog žbunja i formiranje žive ograde te sadnja trave na površini od 400 m². Poduzimaju se svi koraci da naša škola postane eko škola i da nam svima bude zadovoljstvo i uživanje provoditi vrijeme u njoj.

Učestvovali smo i na takmičenjima, ponosni smo na ostvarene rezultate u toku ove školske godine, na rad sekcija.

Na Kantonalnom takmičenju iz Matematike u konkurenciji 10 škola i preko 30 učesnika naša škola se u ukupnom poretku plasirala na 2. mjesto. Ispred nas je bila samo Druga gimnazija. Pojedinačno učenik Jasenko Brakić iz II2 odjeljenja osvojio je 4. mjesto i plasirao se na Federalno takmičanje. Čestitamo na ostvarenom uspjehu sa željom da bude uspješan i na Federalnom takmičenju.

Na Katonalnom takmičenju iz Informatike u konkurenciji 30 učesnika naš učenik Adnan Dervišević iz III2 osvojio je 4. mjesto.

Svojim literarnim radovima članovi Literarne sekcije i ove godine su učestvovali na konkursu za najbolje književne radove sarajevskih srednjoškolaca. U Zborniku koji je tim povodom objavljen nalaze se i radovi naših učenika: Farisa Gigića, Ilme Brezac, Anele Dedajić, Erne Halilagić, Edine Mandžo i Eline Mursalimove. U organizaciji Edukacijskog fakulteta Travnik objavljena je Zbirka priča u kojoj su i radovi Farisa Gigića i Anele Dedajić.

U skladu sa novonastalom situacijom rad sekcija se odvijao onlajn. Obilježili smo praznike naše domovine na strani škole čestitkama i odabranom poezijom. Učenici Dramske sekcije su na različitim lokacijama u gradu recitovali poeziju posvećenu domovini, napravili snimke, objedinili ih u čestitku koja je objavljena na službenoj strani škole.

Članovi Likovne sekcije su radili radove različitim tehnikama, ali na istu temu. Jedini zadatak je bio da crtežom iskažu svoj stav o zdravoj, ekološkoj sredini. To je bila njihova podrška i doprinos realizaciji projekta u koji je uključena naša škola.

Bilo je još aktivnosti i postignutih uspjeha. Poželimo svima da i dalje budu vrijedni i uspješni i da sa ponosom predstavljaju našu školu.